

DOMENIE XXXIII «VIE PAL AN»

Jutoris pe Liturgjie

Domenie, ai 18 di Novembar dal 2018

Svicinantsi al libri di Denêl e al vanzeli di vuê o podin sintîju tant lontans o adiriture fûr dai nestrîs tîmps e mentalitât; se però o rivarìn a rompi la scusse che ju invuluce ju cjatarìn vêrs e tant vicins di nô.

Ai tîmps di Jesù, ancje prime e ancje dopo, par contâ des persecuzions, pogrom e shoah che a sucedevin in continuazion, i perseguitâts a podevin doprâ dome un gjenar di lengaç che si clame apocalitic fat di visions e imagjinis mistereosis, di numars segrets, di peraulis divinis, di fuarcis spirituâls grandis in ben e tremendis tal mâl; e in dut chest, Diu nol varès smenteâts i siei elets e al sigurave la vitorie dai juscj te tremende barufe fra la inicuitât e prepotence dai imperis dal mont e la lote dai sants: la civiltât che e ven de buine gnove di nestri Signôr, e varès vinçût.

Micjêl, il grant princip e chel: si viodarà il Fi dal om a vignî sui nûi cun grande potence e glorie, a apartegnin a cheste sperance che e compagnave i cristianis fra lis persecuzions. In dut ju confuartave la fiducie che il Signôr al stave rivant - imparait dal fiâr cheste parabule - e che la liberazion e jere ormai dongje.

Antifone di jentrade

Gjer 29,11.12.14

Al dîs il Signôr: Jo o cognòs projets di pâs e no di disgraciis;
mi clamarês e jo us scoltarai
e us tornarai a menâ dongje di ducj i lûcs
là che us ai dispierdûts.

Colete

Signôr, nestri Diu, danus la gracie
di cjatâ simpri la nestre contentece tal jessiti fedêi
parcè che dome servint chel ch'al à creadis dutis lis robis buinis
o podarìn vê gjonde complete e eterne.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Dn 12,1-3

In chê volte il to popul al sarà salvât.

Pape Francesc il 29 di Setembar passât, fieste dai trê arcagnui Micjêl, Gabriel e Rafael al à racomandât di preâ in mût particolâr Micjêl te burascjade che la glesie catolice e sta passant. E se il pape lu domande, al vûl dî che il moment al è propit grivi. Forzit i somearà che pe glesie chest al è un timp di tribulazion che no 'nd è stade di compagne.

Però nol covente che o scomodìn i forescj cuant che a cjase nestre lis glesiis no son mai stadis cussì vueitis come in zornade di vuê, i predîs mai cussi pôcs e la int mai cussi lontane...

Te situazion dal nestri Friûl dongje de preiere e vûl ancje la riflession par domandâsi li che si cjatîsi, viers dulà che o lin e ce imprescj che o vin di puartâ cun nô. Si sa che Micjêl, il grant princip al vegle sui fis dal to popul, ma se intant che lui al vegle no si sbombìn, o pisulìn, o lin ognun ai nestrîs dafâs...

Dal libri dal profete Denêl

In chê volte al jevarà sù Micjêl, il grant princip che al vegle sui fis dal to popul. Al sarà un timp di tribulazion che no 'nd è stade di compagne di cuant che a son i popui fint in chel moment. In chê volte il to popul al sarà salvât, ducj chei che si cjataran scrits tal libri.

E une vore di chei ch'a duarmin te tiere dal pulvin si svearan: chescj pe vite eterne, ma chei altris pe vergogne, pe infametât eterne. I savis a lusaran come il lusôr de volte dal cîl e chei ch'a varan menâts une vore di lôr su la strade de justizie a saran come lis stelis in eterno, par simpri. Peraule di Diu.

SALM RESPONSORIÂL

dal Salm 15

I savis a lusaran come il lusôr, *al dîs il libri di Denêl; parcè che il Signôr nol bandone i siei fedêi ni in vite, ni in muart, ni dopo de muart.*

Chest, il timorât di Diu lu sa e in semplicitât nus conte de sô esperience spirituâl e des consolazions de anime sô. A chest pont, o podìn invocâ ancje nô:

R. Vuardimi, Signôr, li di te mi pari.

Se cjantât: Il cjant dai salms responsoriâi, p. 170.

Signôr, part de mê ereditât e gno cjaliç,
tes tôs mans il gno distin tu strenzis.
Il Signôr al è simpri denant dai miei vôi;
se si met a la mê gjestre, no cloparai. **R.**

Par chel il gno cûr al è content e al gjolt dentrivie,
parfîn la mê cjar e polse sigure.
Parcè che no tu i darâs a lis inferis la mê anime,
no tu lassarâs che il to amî al ledi a finîle te tombe. **R.**

Tu mi fasarâs cognossi il troi de vite:
denant di te gjonde fin parsore il cjâf,
ligrie cence fin a la tô gjestre. **R.**

SECONDE LETURE

Eb 10,11-14.18

Crist cuntune uniche ufierte al à smondeâts dal dut e par simpri chei che a son fats sants.

Di domenie in domenie la seconde leture e devente simpri plui une grande esortazion a cjâlâ a la novitât di Crist: al so sacrifici pai pecjâts; i sacrificis dal templi di Jerusalem a jerin un grant dâsi da fâ cence risultât intant che lui cuntune uniche ufierte...

Culî o sin une vore lontans dal clericalisim liturgjic di chei tîmps e di vuê. La letare ai Ebreus nus vierç - in Crist - a un mût gnûf di servî tal cult il Signôr e di vivi la liturgjie.

- come popul di Diu - De letare ai Ebreus

Ogni predi si presente ogni di a funzionâ e a ufrî une vore di voltis i stes sacrificis, che no puedin par mai parâ jù i pecjâts. Lui, invece, vint ufiert un sacrifici pai pecjâts une volte par simpri, si è sentât a la gjestre di Diu e cumò al spiete dome che i siei nemîs a sedin metûts sot dai siei pîts. Parcè che lui al à smondeâts dal dut e par simpri chei ch'a son fats sants. Là che duncje i pecjâts a son perdonâts, nol covente plui fâ ufiertis pal pecjât. Peraule di Diu.

CJANT AL VANZELI

Mt 24,42.44

R. Aleluia, aleluia.

Veglait e tignîtsi prontos,
parcè che no savês in ce di ch'al ven il Signôr.

R. Aleluia.

VANZELI

Mc 13,24-32

Il Fi dal om al tirarà dongje i siei elets dai cuatri aiars.

La incuitât, la sclavitût dai tîmps passâts e jere une sclavitût sore dut fisiche: la miserie, la malatie, la manciance di istruzion, la dipendence di un autoritarisim imperant... In zornade di vuê la sclavitût e je reâl ma di altre cualitât, plui fine e diaboliche.

Vuê o sin sclâfs savint che no si pò o no si vûl cambiâ. Il piçul ce puedial fâ: al è sclâf de sô zornade cence avignî li che al cor de buinore a sere; chel che al à palanche, invezit, il mont torator al pues ancje colâ intant che lui i ten a restâ sclâf dal so ben. Nus àn rindûts sclâfs di mil esigjencis superficials che nus supin energjie, timp, afiets e anime cence che si nacuarzìn. I bêçs, voe o no voe, a son diventâts i nestris parons parcè che vuê cence bêçs nissun si môf.

In dut chest o savìn dome che la nestre famee, comunitât, societât a galopin viers ogni sorte di maljessi interiôr, di violence e di nevrosis che no si rivin a curâ.

Il Signôr nus dîs vuê: cuant che a sparissaran i idui esaltâts de nestre societât materialiste e adorâts come che une volte a adoravin il soreli la lune lis stelis, cuant che chestis stelis a colaran jù dal cîl, dome alore si viodarà il Fi dal om... e rivarà la salvece: une civiltât che si clame finalmentri umane al puest d chê disumanitât di vuê che si slargje simpri di plui tal grant e tal piçul.

Dal vanzeli seont Marc

Gjesù al disè ai siei disepui: «In chei dîs, dopo di chê tribulazion, il soreli si scurissarà e la lune no darà plui la sô lûs; lis stelis a colaran jù dal cîl e lis fuarcis dal cîl a saran savoltadis.

Alore si viodarà il Fi dal om a vignî sui nûi cun grande potence e glorie. E al mandarà i siei agnui e al tirarà dongje i siei elets dai cuatri aiars, dai ultins confins de tiere fintremai a la spice dal cîl.

Imparait dal fiâr cheste parabule: cuant che i siei ramaçs a diventin tenars e a butin fûr lis fueis, o savês che l'istât al è dongje. Cussi ancje vualtris, cuant che o viodarês a capitâ chestis robis, o vês di savê che al è dongje, su la puarte. Us al dîs in veretât che no passarà cheste gjenerazion prime che dut chest nol sedi capitât. Il cîl e la tiere a passaran, ma lis mês peraulis no passaran gran.

Sul cont di chê di o di chê ore, però, nol pò savênt nuie nissun, nancje i agnui dal cîl e nancje il Fi dal om, dome il Pari».

Peraule dal Signôr.

Su lis ufiertis

Signôr, fâs che il regâl
presentât denant dai vôi de tô maiestât
nus otegni la gracie de religjon
e nus siguri un'eternitât furtunade.
Par Crist nestri Signôr.

Antifone a la comunion

Sal 72,28

Par me il gno ben al è dome stâ dongje di Diu,
tal Signôr Idiu o ai metût il gno ripâr.

O ben:

Mc 11,23.24

Us al dîs in veretât: dut ce ch'o domandais te preiere,
crodêt di vêlu za vût e us sarà dât, al dîs il Signôr.

Daspò de comunion

O vin ricevûts, Signôr, i regâi dal to sant misteri
e ti preìn cun dute umiltât
ch'al zovi a fâ cressi il nestri amôr
ce che to Fi nus à ordenât di fâ in sô memorie.
Par Crist nestri Signôr.

Riflession di pre Antoni Beline: La zornade e la ore lis sa dome il Pari

Grande cjacarade che a àn fat in tancj su chest vanzeli e grant scrupulâ su la fin dal mont e de storie. E ancje in di di vuê, che si crodarès che la int no crodi pël, ti vegnin fûr ogni altre di o chei di Gjeove o i catolics de fin dal secul e milenariscj, cun datis e oris precisis. E la int, che no vûl savêdint di crodi in Diu Pari Fi e Spirtu sant, no bat cei daur di chestis pantianis...

Vanzeli par un popul, an B, p.

182

* * *

Cjants

Libri Hosanna, sot dal titul Eucaristie: messe, benedizion eucaristiche, rîts e cjants; dal n.7 al n.62 comprendûts.

* * *

***Se e finîs la societât che o vivìn, no je la fin dal mont;
no je la fin de glesie, la fin di cheste glesie che si cjatìn.***

* * *

La Bibie, midiant dal Istitût “Pio Paschini”, e je tornade fra di nô te gnove edizion Setembar 2018. Dal 4.11.18 - domenie, XXXI Vie pal an - lis leturis e lis citazions a son seont la grafie de gnove edizion.

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitât todescje voltâts par furlan, ed. Glesie Furlane, 2016.*

* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*

* *Par domandâ chescj libris scrivêt a info@glesiefurlane.org*